

四庫全書

史部

欽定四庫全書

史部

東都事略卷十二至十八

詳校官燕吉士臣何道沖

編修臣裴謙覆勘

覆校官編修臣曹城

校對官編修臣許兆椿

謄錄貢生臣王嘉稷

欽定四庫全書

東都事略卷十二

宋王稱撰

本紀十二

欽宗恭文順德仁孝皇帝徽宗長子也母曰顯恭皇后
王氏以元符三年四月己酉生于坤寧殿時徽宗甫登
位即生嫡長欲異其禮越三日辛亥大赦授山南東道
節度使封韓國公建中靖國元年改鎮興德封京兆郡
王崇寧二年拜司空移鎮武昌封定王三年拜太保五

年立爲皇太子宣和七年金人入侵除開封牧徽宗內
禮以十二月辛酉即皇帝位于垂拱殿徽宗出居龍德
宮吳敏門下侍郎壬戌大赦天下立皇太子妃朱氏爲
皇后甲子尼堪圍太原耿南仲僉書樞密院事金人陷
信德府丙寅上道君皇帝尊號曰教主道君太上皇帝
母皇后曰道君太上皇后詔改元

靖康元年春正月丁卯朔詔求直言戊辰金人犯濬州
內侍梁方平以其兵遁大將何灌亦望風潰金人遂度

河已已詔親征吳敏知樞密院事道君皇帝東幸庚午
李綱尚書右丞宇文粹中扈從東幸綱建議城守罷親
征以綱爲行營使辛未白時中罷李邦彥太宰兼門下
侍郎張邦昌少宰兼中書侍郎趙野門下侍郎王孝迪
中書侍郎蔡懋尚書左丞金人逼京師癸酉韓羅布軍
至城下遣李枕鄭望之使于軍前金人移壁開遠門唐
恪同知樞密院事蔡懋爲京城四壁守禦使金人攻通
天景陽門又攻陳橋封丘衛州等門大將何灌死之丙

子皇弟康王使金營庚寅張邦昌從康王詣金營辛巳
道君皇帝至鎮江府路允迪僉書樞密院事大風吹沙
皇子諶封大寧郡王乙酉路允迪使河東尼堪軍丁亥
种師道姚平仲兵至闕下以師道同知樞密院事京畿
河東北路宣撫使四方勤王並隸之己丑种師道與金
人戰于板橋敗之癸巳大霧四塞二月李枕鄭望之至
金營金先遣稅歸是夜姚平仲率步騎萬人劫金砦以
敗還李綱罷庚子金人求上母弟爲質辛丑以宇文虛

中王侁使幹羅布軍齎割三鎮詔書以往太學生伏闕
上書擅殺內臣于闕下李綱復爲尚書右丞金人遣王
汭隨宇文虛中來報聘金人攻咸豐門癸卯皇弟肅王
樞使幹羅布軍蔡懋罷徐處仁中書侍郎宇文虛中僉
書樞密院事乙巳以宇文虛中王侁再使幹羅布軍是
日康王還自金營丙午罷明堂頒朔布政丁未金人退
師戊申大赦天下詔曰自今庶事並遵用祖宗舊制選
用大臣裁抑內侍不崇飾恩倖不聽任姦人不輕爵祿

不濫賜予不奪爾居以營燕遊之地不竭爾力以廣浮
用之費凡蠹國害民之事一切寢罷咨爾有衆明聽朕
言庚戌李邦彥罷張邦昌太宰兼門下侍郎吳敏少宰
兼中書侍郎李綱知樞密院事耿南仲尚書左丞李桄
尚書右丞辛亥宇文粹中罷癸丑种師道罷尼堪兵次
高平甲寅童貫蔡攸貶貫仍致仕金人陷隆德府守臣
張確死之辛亥斬梁方平于都市遣王雲曹曠使幹里
驛軍王孝迪罷三月戊辰李桄罷己巳張邦昌罷徐處

仁太宰兼門下侍郎唐恪中書侍郎何臬尚書右丞許
翰同知樞密院事庚子宇文虛中罷命趙野蔡攸奉迎
道君皇帝辛巳道君皇帝至南京壬午詔曰朕承道君
皇帝付託之重即位十有四日金人之師已及都城大
臣建言捐金帛割土地可以紓禍賴宗廟之靈守備弗
缺久乃退師而金人要盟終弗可保今肅王度河北去
未還尼堪深入南陷隆德又所過殘破州縣掠士女朕
夙夜追咎何痛如之已詔元主和議李邦彥及奉使許

地之人悉行罷黜又詔种師道姚古种師中往援三鎮
朕惟祖宗之地尺寸不可與人且保塞陵寢所在誓當
固守不忍陷三鎮二十州之民以媮頃刻之安與民同
心永保疆土播告中外使知朕意癸卯命李綱迎道君
皇帝于南京辛卯李綱自南京還夏四月丁酉朔立大
寧郡王諱爲皇太子戊戌夏人寇震威城己亥道君皇
帝至自南京入居龍德宮癸卯耿南仲門下侍郎戊申
置詳議司于尚書省己酉趙野罷壬子韓侂布遣賈寔

冉企來甲寅以种師道爲河北河東宣撫使戊午皇弟
拭封和王榛信王癸亥誅趙良嗣五月庚午寒如深冬
甲戌赦河北丁丑种師中與金人戰于榆次死之甲申
罷詳議司六月戊戌李綱爲河北河東宣撫使辛丑以
劉韜爲副使壬寅皇弟榑封安康郡王捷廣平郡王詔
曰朕既詔三省樞密院並依祖宗舊法而羣臣庶士亦
當講孔孟之正道察安石舊說之不當者壬戌彗出紫
微垣秋七月辛卯誅童貫勝捷軍叛犯濮州韓世忠討

平之八月辛丑詔以彗見條具疾苦俾官吏除苛解嬈
冀召和氣折可求與金人戰敗績退保汾州甲辰以宗
澤使幹羅布軍李若水使尼堪軍己未徐處仁吳敏罷
唐恪少宰兼中書侍郎何臬中書侍郎陳過庭尚書右
丞許翰罷聶昌同知樞密院事李回僉書樞密院事九
月丙寅尼堪陷太原府帥張孝純爲金人所執戊寅李
綱罷分天下爲四道置四帥帶都總管北京帥總北道
西京帥總西道南京帥總東道鄧州帥總南道冬十月

丁酉金人陷眞定府戊戌金人遣楊天吉王汭來欲割
三鎮要尊號車輅等朝廷以帝號車輅及三鎮稅數遣
王雲同汭行庚子陷汾州守臣張克戩死之丁未馮澥
知樞密院事壬子皇弟康王使幹羅布軍以王寓爲尚
書左丞副之寓辭行貶以馮澥代之丙辰金人犯平陽
府澤州十一月丙寅夏人陷懷德軍守臣劉銓通判杜
翊世死之戊辰康王還馮澥罷王雲還言金必欲得三
鎮庚午詔河東河北京畿清野甲戌金人度河乙亥命

皇弟康王再使幹羅布軍王雲副之京師戒嚴丁丑何
桌罷陳過庭中書侍郎孫傳尚書右丞庚辰康王至相
州辛巳命聶昌領守禦使壬午康王次磁州磁人殺王
雲康王回相州命耿南仲使幹羅布軍聶昌使尼堪軍
甲申孫傳同知樞密院事曹輔僉書樞密院事乙酉幹
羅布軍至城下丁亥李回罷金人攻通津門楊天吉等
再來己丑張叔夜以南道勤王之師到闕庚寅皇帝幸
東壁勞軍何桌門下侍郎閏月壬辰皇帝幸西壁唐恪

罷改太宰少宰復爲左右僕射以何臬爲尚書右僕射
兼中書侍郎癸巳皇帝幸東壁是日迎土牛以借春甲
午皇帝幸北壁大雨雪金人陷懷州守臣霍安國死之
乙未皇帝幸西壁丙申皇帝幸南壁金人陷拱州丁酉
赤氣亘天馮澥尚書左丞尼堪兵薄南壁王宗漣下城
與金人戰敗績庚子皇帝幸東壁張叔夜僉書樞密院
事金人攻宣化門壬寅皇帝幸北壁癸卯聶昌至絳州
遇害甲辰大雪金人陷亳州丙午大雪金人爲鵝車以

攻城己酉命皇弟康王爲兵馬大元帥辛亥金人來議和要親王出盟壬子遣曹輔馮澥及宗室仲溫士誨使于金營癸丑仲溫士誨還甲寅至丙辰大風雪不止金人陷京師上曰朕不用种師道言以至於此初敵騎之去也師道常勸上半度擊之不然異日必爲後患至是果然金人遣蕭慶等四人來要皇帝會盟議欲請道君皇太子越王鄆王爲質上曰朕爲人子豈可以父爲質哉丁巳道君皇帝入居延福宮金人盡得四壁遣李若

水再使金營金人招宰相議事乃遣何梟及濟王相梟
相回同金人四人來議和自己卯雪大作盈三尺不止
天地晦冥雪霽彗星竟天己未何梟再往軍前詔曰大
金堅欲道君出郊朕以宗廟生靈之故義當親往咨爾
衆庶無致驚疑庚申旦日赤如火辛酉皇帝出郊入金
營十二月壬戌朔皇弟康王開兵馬大元帥府于相州
癸亥皇帝還宮甲子金人來索金一千萬錠銀二十萬
錠練帛如銀之數以犒軍乙丑詔曰元祐皇后逮事宣

仁聖烈皇后欽聖憲肅皇后又曾經送哲宗皇帝山陵
元符之末欽聖憲肅皇后垂簾曾降指揮復冊命爲元
祐皇后可檢會恭依元降指揮仍尊爲元祐皇后以順
天下之意丙寅遣陳過庭劉韜折彥文往河北河東割
地金人拘過庭于軍前丁卯金人來索軍器乙亥皇弟
康王如大名府是夜京師火癸未詔曰風雪大寒小民
闕乏凍餒皆朕不德所致其艮山竹木許任便樵採庚
寅皇弟康王如東平府金人犯蔡州

二年春正月庚子皇帝再出郊入金營丙午劉韜死于金營二月丙寅吳玠莫儔自金營持文書令依金主詔推薦異姓堪爲人主者從軍前備禮冊命仍邀道君皇帝出城丁卯道君皇帝道君皇后同出郊鄆王楷以下諸王妃公主都尉皆從燕王越王亦出辛未皇后皇太子同出郊壬申孫傳張叔夜往軍前戊寅金歸張邦昌庚辰康王如濟州金人無禮於我李若水死之乙酉金人以金銀不足殺梅執禮程振陳知質安扶三月辛卯

朔張邦昌入京師丙申吳革謀起義不克死之丁酉金人立張邦昌國號大楚宗澤與金人戰于長垣敗之庚子金人來取宗室甲辰金人入內藏庫乙卯馮澥曹輔路允迪等還何桌孫傳張叔夜秦檜司馬朴以廢立異議令舉家北遷丁巳道君皇帝北狩夏四月庚申朔皇帝北狩金人退師遂取河東河北地辛酉康王以檄書告諭四方壬戌邦昌迎元祐皇后入居延福宮號宋太后癸亥羣臣勸進于康王甲子邦昌以書至大元帥府

丁卯謝克家以邦昌之命齋玉璽至大元帥府戊辰邦昌請元祐皇后垂簾聽政庚午邦昌復辟癸酉在京文武百官勸進于康王乙亥以路允迪爲奉請車駕進發使范宗尹副之康王自濟州由金鄉單父以至南京癸未駐軍府治甲申張邦昌至南京伏地慟哭請死王慰撫之戊子元祐皇后遣使齋手書于南京五月庚寅朔康王即皇帝位于南京遙上尊號曰孝慈淵聖皇帝紹興三十一年金國使來言皇帝去冬崩聖壽六十一七

月癸未謚曰恭文順德仁孝皇帝廟號欽宗

臣稱曰自吾有狄難而欽宗適丁斯時天下之勢岌岌
矣欽宗乃當寧興歎思得賢佐以張國威而朝無君子
終敗乃事蓋百六之會難逭也然民之戴宋有死無二
此仁聖所以中興于南都云

東都事略卷十二

欽定四庫全書

東都事略卷十三

宋王稱撰

世家一

詩稱闕睢之德所以正夫婦而化天下也是以輔佐君子有逮下之仁而無嫉妬之心懷進賢之志而有憂勤之念用能助成一代之治以興太平之基塗山啟夏任姒作周豈不曰內德之茂哉昭憲杜后篤生上聖以造我宋其宏規遠慮實應闕睢之德與塗山任姒亦何以

異自昭憲以降正始之道相守如一皆以遵承祖宗家法為先是雖賢德懿範有所從始然亦列聖修身正心齊家之本有以極其摯如此至於名品之別儀制之序其所由來者尚矣故略而不書

宣祖昭憲皇后杜氏定州安喜人也父爽贈太師后既笄歸于宣祖治家嚴毅有禮法生太祖太宗周顯德中太祖為定國軍節度使封南陽郡太夫人及太祖為羣情推戴自陳橋還京師人走報后曰點檢已作天子后

曰吾兒素有大志今果然矣太祖既即位拜后於堂上
衆皆賀后愀然不樂左右進曰臣聞母以子貴今子爲
天子胡爲不樂后曰吾聞爲君難且天子者置身兆庶
之上若治得其道則此位可尊苟或失馭則求爲匹夫
不可得是吾所以憂也子其勉之太祖再拜曰謹受教
於是尊爲皇太后建隆二年后不豫太祖侍藥餌不離
左右疾亟召趙普入受顧命后因問太祖曰汝知所以
得天下乎太祖嗚噎不能對后問之如初太祖曰臣所

以得天下者皆祖考及太后之積慶也后曰不然正由周世宗使幼兒主天下耳使周氏有長君天下豈為汝有乎汝百歲後當傳位于汝第四海至廣萬幾至衆能立長君社稷之福也太祖頓首泣曰敢不如太后教后因謂趙普曰爾同記吾言不可違也命普於榻前為約誓書普於紙尾自書名云臣普書藏之金匱命謹密宮人掌之后崩于滋德殿年六十謚曰明憲葬安陵神主祔享太廟乾德二年改卜安陵更謚曰昭憲合祔安陵

太祖孝惠皇后賀氏開封人右千牛衛率府率景思長女也晉開運初宣祖為太祖娉焉太祖領定國軍節度使封會稽郡夫人性溫恭柔順事舅姑盡禮生子德昭周顯德五年寢疾崩年三十宋興追冊為皇后謚曰孝惠葬于安陵之西北神主享于別廟神宗時與孝章淑德章懷並祔享太廟

孝明皇后王氏邠州新安人彰德軍節度使饒之第三女也孝惠崩納為繼室封琅邪郡夫人建隆元年立為

皇后后慈仁恭勤奉養太后得其驩心崩年二十二謚曰孝明葬于安陵之北神主享于別廟太平興國二年祔享太廟

孝章皇后宋氏河南洛陽人左衛上將軍偓之長女也孝明崩太祖遂聘入宮爲皇后年十七性柔順好禮太祖崩號開寶皇后居西宮雍熙四年移居東宮崩年四十四謚曰孝章祔葬永昌陵之北神主享于別廟神宗時升祔太廟

臣稱曰廟室祔以一后若追冊者則否太祖祔以孝明者禮之正也太宗祔以懿德者蓋以明德在也及明德崩與懿德同祔而元德以誕育真宗亦得祔焉此則禮從變也於此之時孝章豈不應與孝明同祔邪真宗廟室亦祔三后而孝章又不得升配太祖復何邪至神宗之世追冊之后並配于廟於是孝章始升祔云

太宗淑德皇后尹氏相州濮人滁州刺史廷勛之女也太宗在周時娶焉早崩太宗即位追冊為皇后謚曰淑

德葬于孝明陵之西北享于別廟後神主升祔太廟
懿德皇后符氏陳州宛丘人魏王彥卿第六女也顯德
初歸太宗國初封汝南郡夫人建隆二年封楚國夫人
太宗封晉王進封越國崩年三十四葬于安陵之西北
太宗即位追冊為皇后謚曰懿德享于別廟真宗即位
詔有司議太宗配后宰相請以懿德配而宗正卿趙安
易請以淑德配是時禮官以明德在萬安宮淑德懿德
生不及尊崇之位没升配享於人情未安請虛配位祕

閣校理吳淑駁議皆以爲未允時將追尊元德淑因請以元德升配詔曰禮非天降地出酌于人情其以懿德皇后配於是神主升祔太廟

明德皇后李氏潞州上黨人潞州刺史處耘第二女也懿德崩太祖爲太宗聘爲妃既納幣會太祖崩至太平興國二年始入宮雍熙元年立爲皇后太宗崩眞宗即位尊后爲皇太后居西宮之嘉慶殿上宮名曰萬安崩年四十五謚曰明德祔葬永熙陵禮官請以懿德明德

同祔太宗室以先後為次從之

元德皇后李氏真定人乾州防禦使英之女也開寶中封隴西郡君太宗即位進夫人性恭肅有法度六宮推重之生楚王元佐及真宗薨年三十四真宗即位追封賢妃又追上尊號為皇太后謚曰元德祔葬永熙陵享于別廟大中祥符三年禮官趙湘請以元德皇后祔太宗廟室真宗曰此重事也俟令禮官議之至六年宰相王旦與羣臣繼請然後從之祔明德之次

真宗章懷皇后潘氏大名人忠武軍節度使美之第八女也真宗為韓王太宗為聘之名入宮封莒國夫人崩年二十二真宗即位追冊為皇后謚曰莊懷葬于永昌陵側陵名保泰神主享于別廟後升祔太廟國朝皇后謚冠以帝謚慶厯中禮官言孝字連太祖謚德字連太宗謚遂改莊為章以連真宗謚云

章穆皇后郭氏太原人宣徽南院使守文第二女也真宗為襄王太宗為聘之封魯國夫人進封秦國真宗即

位立為皇后崩年三十二謚曰莊穆葬永熙陵之西北
神主享于別廟乾興元年升祔真宗廟室後改謚曰章
穆

章獻明肅皇后劉氏益州華陽人也父通贈太師魏王
后善播鼗蜀人龔美與之入京師美以鍛銀為業真宗
為襄王納于潛邸張耆為王宮指使王乳母秦國夫人
性嚴整因令王斥去因為太宗言之王不得已置之張
耆家太宗崩真宗即位以為美人以其無宗族乃更以

美為兄弟改姓劉大中祥符中為脩儀進德妃自章穆崩真宗欲立為皇后大臣多以為不可真宗卒立之李宸妃入宮生子是謂仁宗后以為己子與楊淑妃撫視甚篤天禧四年真宗疾甚宰相寇準密議請皇太子監國以謀泄罷相既而入內都知周懷政謀廢后復用準為楊崇勲所告懷政誅準貶海上真宗崩仁宗即位尊后為皇太后軍國大事權取皇太后處分垂簾聽政詔書稱吾以生日為長寧節出御大安輦鳴鞭侍衛如乘

與父名通令天下皆避父諱有劉綽者自京西漕臣還朝以其在部日盤量在庾之糧得千餘斛乞付三司后問曰卿識王曾張知白呂夷簡魯宗道乎此四人者豈因盤量收出賸進哉綽大慙當時廷臣皆服后之明天聖七年冬至仁宗率百官上壽會慶殿及恭謝宗廟乘玉輅褱衣九龍華釵冠行禮則服袞衣減宗彛藻去劍戴儀天冠前後垂珠翠各十旒于時小臣方仲弓上書請依武后故事立劉氏廟而程琳亦獻武后臨朝圖后

擲其書于地曰吾不作負祖宗事后稱制凡十一年自
仁宗即位乃諭輔臣曰皇帝聽斷之暇宜詔名儒講習
經書以輔其德於是設幄崇政殿之西廡而日命近臣
侍講讀丁謂曹利用既以侮權貶竄而天下惕然畏之
晚年稍進外家而信任內官仁宗春秋高猶不知爲宸
妃所出終后之世無豪髮間隙蓋仁宗能盡孝而后亦
慈愛保護之至也崩年六十四謚曰章獻明肅國朝皇
后二謚稱制者則加四謚葬于定陵之西北於是泰寧

軍節度使同平章事錢惟演請以章獻明肅章懿與章
穆並祔真宗之室詔禮院議禮官以章穆祔食真宗斯
為正禮章獻母儀天下與明德例同章懿帝母之尊與
元德例同且前代無同日並祔之禮其二后或祔真宗
廟室或祀別廟惟上裁之詔三省與禮院更議皆以為
章穆皇后位崇中壺與懿德無異已祔真宗廟室自叶
一帝一后之文章獻明肅處坤元之尊章懿感日符之
貴皆功德莫與為比謂宜崇建新廟同殿異室歲時薦

饗一用太廟之儀仍別立廟名以崇世享於是翰林學士馮元等請以奉慈為名詔從之至慶曆五年禮院言章獻章懿二后請遵國朝懿德明德元德三后同祔太宗廟室故事遷祔真宗廟室詔兩制議翰林學士王堯臣等議請二后遷祔真宗廟室序於章穆之次從之章懿皇后李氏杭州人也性莊重寡言初入宮為司寢生仁宗封崇陽縣君進才人為婉儀仁宗即位為順容初章獻以仁宗為己子而后不敢言中外亦未知也及

后病革乃進為宸妃薨年四十六章獻崩明道二年追冊為皇太后謚曰章懿葬永定陵祔于別廟升祔太廟章惠皇后楊氏益州郫人也少事真宗于藩邸景德初為才人進婕妤又進婉儀拜淑妃真宗崩以遺制為皇太妃章獻崩遺詔為皇太后同議軍國事議者以仁宗春秋高遂刪去同議軍國事之語不以攸天下號保慶皇太后仁宗未有嗣每勸仁宗選宗子近屬養于宮中其選即英宗也無疾而終年五十三謚曰章惠

仁宗廢后郭氏平盧軍節度使崇之孫也后生而性聰
悟有容德天聖二年立為皇后時仁宗寵張美人欲以
為后章獻難之后既立而頗見疎也其後尚美人楊美
人俱得幸數與后忿爭宰相呂夷簡請廢后仁宗亦以
其無子遂廢之封為淨妃玉京沖妙仙師賜名清悟居
長樂宮於是御史中丞孔道輔右司諫范仲淹等伏閣
言后無過不可廢既而道輔等俱被逐景祐元年出居
瑤華宮而尚美人亦廢於洞真宮入道楊美人於別宅

安置又賜號金庭教主冲靜元師仁宗頗念之遣使存
問賜以樂府后和荅之辭甚悽愴仁宗嘗密令召入后
曰若再召我須百官立班受冊方去其所守如此后有
小疾命內侍閤文應挾鑿眎療數日乃言后暴薨年二
十四外人莫能明也仁宗甚悼之追復皇后而傳謚冊
祔廟之禮

慈聖光獻皇后曹氏贈韓王彬之孫贈吳王玘之女也
皇后郭氏廢詔娉入宮冊立爲皇后后性節儉喜稼穡

宮中種五穀親蠶好讀史書飛白慶曆八年後八月望日仁宗欲於禁中張燈后諫止之後三日衛士作亂至寢殿仁宗聞變遽欲出后召都知王守忠以兵入衛后知賊必縱火乃遣宦者持水踵賊後賊果以燭焚簾水隨滅之是夕所遣宦者后親翦髮以爲識諭之曰賊平加恩當以髮爲證故宦者爭盡死力賊即擒滅張貴妃專寵驕恣后待之謹妃屢危中之卒不能害也英宗始四歲鞠養于禁中宣仁聖烈皇后后之甥也與英宗同

歲亦鞠於后所仁宗曰他日以此女歸之后許諾仁宗
春秋高未有繼嗣天下寒心后居中決定大策遂以英
宗為皇子入居慶寧宫后待之恩意尤密仁宗崩英宗
即位尊后為皇太后英宗感疾詔軍國事請太后權同
處分乃御內東門小殿垂簾聽政天下翕然事涉曹氏
及內臣者無少絲豪假借英宗寢康復后下手書歸政
詔以所居宮殿名曰慈壽英宗崩神宗即位尊后為太
皇太后易宮名曰慶壽神宗用王安石變更法度用兵

興利而天下紛然神宗一日侍宣仁后同岐王至慶壽宮后曰吾昔聞民間疾苦必以告仁宗嘗因赦行之今宗祀在邇亦當爾神宗曰今無他事后曰吾聞民間甚苦青苗助役錢宜因赦罷之神宗曰新法以利民非苦之也后曰王安石誠有才學怨之者衆何不出之於外神宗曰羣臣中唯安石能橫身為國家也岐王曰太皇太后之言至言也陛下不可不思神宗不懌神宗有意於燕薊已與大臣議定乃詣慶壽宮白其事后曰儲蓄

賜予備乎鎧仗士卒精乎神宗曰平戎所須積有年所
固已辦之矣后曰事體至大吉凶悔吝生乎動得之不
過南面受賀而已萬一不諧則生靈所係粟帛所蠹未
易以言苟可取之太祖太宗收復久矣何待今日神宗
曰敢不受教蘇軾以詩得罪下御史獄人知必死后違
豫中聞之謂神宗曰嘗憶仁宗以制科得軾兄弟甚喜
曰吾爲子孫得兩宰相今聞軾以作詩繫獄得非仇人
中傷之据至於詩其過微矣吾疾執已篤不可以冤濫

致傷中和宜熟察之神宗涕泣軾由此得免后疾久不平忽顧左右問此為何日左右對以十月二十日后頷之廼自語曰只此日去只此日去免煩他百官蓋是日太祖大忌也遂崩其達生死之變如此年六十四謚曰慈聖光獻葬于永昭陵神主祔于太廟

溫成皇后張氏河南永安人也祖潁進士第終建平令父堯封亦舉進士為石州推官以卒時兄堯佐補蜀官堯封妻求挈孤幼隨之官堯佐不收恤辭以道遠止之

堯封母錢氏女也妃幼無依由錢氏納于章惠皇子宫
寢長得幸有盛寵妃巧慧多智數善承迎執動中外慶
歷元年封清河郡君歲中為才人遷脩媛三年忽被疾
曰妾姿薄不勝寵名願為美人許之皇祐初進貴妃後
五年而薨年三十一仁宗哀悼之追冊為皇后謚曰溫
成父堯封追封清河郡王謚曰景思而堯佐夤緣僥幸
致位通顯云

東都事略卷十三

欽定四庫全書

東都事略卷十四

宋王稱撰

世家二

英宗宣仁聖烈皇后高氏亳州蒙城人也曾祖瓊贈魏王祖繼勲贈楚王父遵甫贈魯王慈聖光獻皇后后之從母也以故少與英宗同育禁中既長歸英宗英宗入繼大統治平二年立為皇后后明睿習史所以輔佐憂勤備至后既立第士林管當御藥院將遷官后曰妾乃

安敢上比章獻明肅皇后及皇太后陛下承顏長樂故
推恩曹氏以致孝愛之意願母以妾故亂祖宗法神宗
即位尊為皇太后宮曰寶慈元豐七年大燕延安郡王
侍立神宗諭輔臣曰明年建儲當以司馬光呂公著為
師保至明年神宗不豫王珪蔡確韓縝章惇請對福寧
殿珪乞立延安郡王為皇太子請太后權同聽政神宗
領之珪等見太后簾下后泣撫王曰兒孝順自官家服
藥未嘗去左右書佛經以祈福喜學書已誦論語七卷

絕不好弄乃令王出簾外見珪等珪等再拜謝且賀是日降制立為皇太子后敕中人梁惟簡曰令汝婦製一黃袍十歲兒可衣者密懷以來蓋為王倉卒踐祚之備也神宗與后屬意於哲宗者如此初雍王顥曹王顥日詣寢殿問起居至是后諭二王非宣召毋得入哲宗即位尊為太皇太后與皇帝御延和殿垂簾聽政詔書稱吾以生日為坤成節出入御大安輦警蹕侍衛如乘輿立魯王諱更宮名曰崇慶召司馬光呂公著等于外未

至遣中使迎勞手書問以今日設施所當先者既而有旨散遣脩京城役夫罷減皇城內覘者止御前工作出近侍無狀者三十餘人戒敕中外無敢苛刻暴斂廢導洛司物貨及民所養戶馬寬保馬限皆從中出大臣不與王珪薨蔡確章惇以罪去韓縝亦罷政光與公著同心輔政於是更新法之不便於民者以常平舊法改青苗以嘉祐差役參改募役除市易之法寬茶鹽之禁賜邊若贖亡民以和西戎而天下復安元祐三年御試進

士有司請如天聖故事皇帝皇太后同御殿不許有司
請受冊文德殿后曰吾豈敢比章獻且文德殿天子正
牙也非女主所當御以早詔停冊禮羣臣固請乃聽廷
議患官冗詔裁損外家恩四之一服用儉質素見厚於
慶壽遵其餘矩不敢忘斥賣橐裝命近侍往西洛舉曹
氏喪數百悉封之后臨朝九年於寢食起居所以調護
於哲宗者懇惻周盡八年后寢疾召宰輔至簾前曰今
日疾少間欲與公等訣皇帝年少善輔導之崩年六十

二謚曰宣仁聖烈。葬永厚陵。神主祔享太廟。

神宗欽聖憲肅皇后向氏故宰相敏中之曾孫贈楚王傅亮之孫贈秦王經之女也。以治平三年歸于潁邸。封安國夫人。神宗即位立為皇后。神宗崩。哲宗即位尊為皇太后。居慈德宮。后平居無玩好。閱祖宗實錄寶訓。遂以通知故事。向氏有援他族例遷官者。后曰。吾族未嘗有此。詎可以恩廢法。哲宗選后及諸王擇婦。后豫戒族人勿以諸女自言。宣仁聖烈皇后命有司葺舊慶壽宮。

請后居之后固辭曰豈有婦居東而姑處西瀆上下之分宣仁嘉其正以慶壽後殿為隆祐宮哲宗崩宰相章惇有異議后毅然獨斷決策立徽宗遂權同處分軍國事凡故事所有如御正殿避家諱立誕節之類皆不用每聞褒錄勲賢省賦息兵崇儉愛民之事則喜見容色是歲降手書還政崩于慈德殿年五十六謚曰欽聖憲肅葬永裕陵神主祔于太廟

欽成皇后朱氏本姓崔父傑母李氏后少依任廷和家

冒繼父朱士安姓初入宮為御侍進才人又進婕妤元豐中拜昭容封賢妃進德妃哲宗即位尊為皇太妃居瑞聖宮哲宗及蔡王似皆其所生也元祐三年太皇太后詔曰皇帝嗣位于茲四年皇太妃以恭儉之德鞠育之恩雖典策以時奉行而情文疑有未稱皇帝以祖考之奉尊無二上而吾惟春秋之義母以子貴其推天下之養以慰人子之心宜下有司尋繹典故於是櫛子飾以龍鳳繖用紅羅增從衛人冠服等並依皇后惟所居

宮閣不設鷗尾又詔皇太妃儀制已依皇后其宮閣合稱殿與不禮官言緣禮尊無二上皇太妃無稱殿立殿名之制宣仁后山陵復土復下詔令禮官參攷典禮又詔曰昨親奉皇太后聖諭皇太妃特與立宮殿名坐六龍輿進黃繖出入由宣德正門三省乃議皇太妃坐龍鳳輿繖紅黃兼用遇從皇太后出入止用紅宮中並依皇后儀制於是宮殿名並以瑞聖為名崇寧元年崩年五十一追尊為皇太后謚曰欽成陪葬永裕陵神主升

祔于神宗廟室

欽慈皇后陳氏開封人也以選入禁中年十七神宗以爲御侍生徽宗封才人遷美人薨年三十三贈貴儀徽宗即位詔有司議尊崇之禮追號皇太妃建中靖國元年追尊爲皇太后謚曰欽慈陪葬永裕陵神主陞祔于神宗廟室

哲宗昭慈聖獻皇后孟氏洺州人眉州防禦使元之孫女也元祐七年太皇太后以六禮儀制娉入宮立爲皇

后以左僕射呂大防攝太尉充奉迎使同知樞密院事
韓忠彥攝司徒副之尚書左丞蘇頌攝太尉充發策使
僉書樞密院事王巖叟攝司徒副之尚書右丞蘇轍攝
太尉充告期使皇叔祖同知大宗正事宗景攝宗正卿
副之皇伯祖判大宗正事高密郡王宗晟攝太尉充納
成使翰林學士范百祿攝宗正卿副之吏部尚書王存
攝太尉充納吉使權戶部尚書劉奉世攝宗正卿副之
翰林學士梁燾攝太尉充納采問名使御史中丞鄭雍

攝宗正卿副之后既立而劉婕妤寵幸陰有奪位之意
紹聖三年哲宗遂廢后黜居瑤華宮賜號華陽教主玉
清妙淨仙師名冲真初后朝謁景靈宮訖事就坐諸嬪
御皆立侍劉婕妤獨背立簾下后閣中人陳迎兒喝曰
綽開婕妤背立如故迎兒退歸有不平語由此閣中皆
忿冬至日會朝隆祐宮侯見於他所后所御坐朱髹金
飾宮中之制惟后乃得之劉婕妤在他坐意象頗愠其
從行者爲易坐製與后等衆皆側目不能平者故傳唱

曰皇太后去所婕妤亦起立尋各復所或已徹婕妤坐
頓于地懟不復朝泣而去且訴于哲宗內侍郝隨謂婕
妤曰毋以此戚戚願蚤為大家生子此坐正當為婕妤
有耳會福慶公主疾后有姊頗知醫嘗已后危疾以故
出入掖庭公主藥弗效廼取道家治病符水以入宮嫜
以示后后變色問曰此何從來嫜對以實后曰六姊寧
知中禁嚴密與外舍異邪戒令存之俟見上言所以然
已而哲宗過視公主疾后持以告哲宗哲宗曰此亦人

情之常耳后即取符焚於前宮禁相傳厭魅之端作矣
方公主病革忽有紙錢在旁后顧視頗惡忌之意自健
好所遣人持來益有疑心未幾后養母聽宣夫人燕氏
爲后禱祠事聞詔入內押班梁從政管當御藥院蘇珪
即皇城司鞠之獄成命侍御史董敦逸錄問遂詔廢后
詔獄初起禁中捕逮幾三十人華楚甚峻皆宦官宮妾
柔弱之人暨錄問罪人過庭下者氣息僅屬或肢體已
毀折至有無舌者無一人能聲對敦逸秉筆疑未下郝

隨從旁以言脅之敦逸畏禍不能剛決乃以奏牘上蓋宰相章惇迎合於外而隨擠排於內莫有敢異議者其後敦逸奏言中宮之廢事有所因情有可察詔下之日天爲之陰翳是天不欲廢之也人爲之流涕是人不欲廢之也且言其常錄問獄事恐得罪天下後世哲宗曰敦逸不可更在言路曾布曰陛下本以皇城獄出於近習推治故命敦逸錄問今乃貶錄問官何以取信中外哲宗乃然之哲宗崩欽聖后臨御復其位號號元祐皇

后崇寧元年馮澥上書以復后非是臺臣合奏共附和之蔡京主其說力請不已徽宗從之詔依紹聖詔旨復居瑤華宮加賜希微元通知和妙靜仙師靖康元年冬金人陷京師及二聖北狩自道君皇后皇太子以下后妃嬪御諸王帝姬并宗室近屬皆北徙而后以廢居瑤華不與也張邦昌為金人所逼僭位號乃奉迎后于瑤華入居延福宮邦昌避位請后垂簾聽政號元祐皇后入居禁中時康王為兵馬大元帥后以位授之於是康

王即位于南京其後事具日歷

昭懷皇后劉氏初入宮爲御侍明豔冠後庭初封昌平
郡君進美人又進婕妤遂拜賢妃有盛寵由是孟后廢
元符二年立爲皇后哲宗崩欽聖念孟后無罪乃召入
復位號稱元祐皇后而后稱元符皇后及欽聖崩元祐
皇后復廢乃進號太后居崇恩宮政和三年后無疾而
崩年三十五謚曰昭懷陪葬永泰陵神宗升祔于哲宗
廟室

欽定四庫全書

東都事略
卷十四

九

徽宗顯恭皇后王氏德州刺史藻之女也歸于端邸封
順國夫人徽宗即位冊為皇后生欽宗崩年二十五謚
曰靖和葬永裕陵之次神主祔于別廟改謚曰惠恭後
又改曰顯恭

顯肅皇后鄭氏開封人也父紳始為直省官以后貴累
封太師樂平郡王后本欽聖殿押班徽宗為端王每日
朝慈德宮欽聖命鄭王二押班供侍及即位欽聖以二
人賜之王後封貴妃鄆王母也崇寧初后封賢妃遷貴

妃后有異寵徽宗多賚以詞章天下歌之王后崩政和元年立為皇后欽宗即位尊后為道君太上皇后居寧德宮靖康元年金人犯京師后從徽宗北遷云

顯仁皇后韋氏開封人也生太上皇帝徽宗狩沙漠后從北遷太上皇帝在御尊為皇太后紹興十二年驪駕還歸其後事具日曆

明達皇后劉氏贈太尉彥清女也入宮為御侍遷才人進美人又遷婉儀進位淑妃德妃冊拜貴妃政和三年

薨年二十七徽宗欲踵溫成故事遂追冊為皇后謚曰明達陪葬惠恭皇后園

明節皇后劉氏本酒家保女也父宗元以女貴為興寧軍節度使始入宮為小殿直都知係昭懷殿寢被顧遇後以事囚於宦者何訢家內侍楊戩奏取歸復得入宮明達薨以同姓之故使承明達閣焉由才人為婕妤累遷賢妃又為淑妃進位貴妃性穎悟能迎旨合意又善裝飾衣冠塗澤一新世爭效之道士林靈素以左道得

幸謂上為長生帝君謂妃為九華玉真安妃每神霄降
必別寘安妃位圖畫肖妃象謂每祀妃妃方酣寢而覺
有酒色始妃因何訢家訢遇妃不禮焉及得志遂陷訢
以罪未幾妃薨年三十三時宣和三年也追冊為皇后
謚曰明節與明達並園立祠

欽宗皇后朱氏開封祥符人也父伯材武泰軍節度使
欽宗為皇太子冊為妃及即位為皇后靖康之禍欽宗
幸金營邀駕以行后亦北徙云



臣稱曰古有攝主而秦漢以來則以母后攝國朝稱制者五章獻擁幼君政由房闈而保祐勤勞之恩為大慈聖宣仁德及天下欽聖昭慈功在社稷而宣仁致治之懿比迹永昭其來有自矣於虜母后攝政之賢自秦漢迄今未有加于我宋者也真社稷生靈之福哉

東都事略卷十四

欽定四庫全書

東都事略卷十五

宋王稱撰

世家三

烏乎論封建者何其紛紛哉世徒見春秋齊晉之彊漢
室吳楚之亂遂一切歸咎於三代之良制是大不然周
建親賢漢王同姓以蕃王室故詩所稱懷德惟寧宗子
維城者封建之謂也周享過歷之期而漢載祀四百茲
非其效與周德雖衰齊晉尚能攘戎狄以尊天子豈不

以封建之利也哉。若夫吳楚之所以亂者，乃在於封國過制，以成尾大不掉之執，爾非封建之罪也。本朝大道之行，與天下爲公，故宗親無茅土之胙。至熙寧中以宣祖、太祖、太宗之子擇其後一人，世世封公，雖有世襲之爵，而皆聚之京師，維城之固，果安在哉？天下治雖不封建，可也。天下有變，則封建有可恃之理。是以靖康之難，天族亡尺寸之柄，而亦安有所謂召穆公者？糾合宗族，予成周是可歎也。由是觀之，封建宗親以屏蔽天下，誠

有國者之當務也哉

宣祖五子長曹王光濟次太祖皇帝次太宗皇帝次魏王廷美次岐王光贊

曹王光濟早亡宋興追封邕王徽宗即位改封曹王
魏王廷美字文化本名光美宋興授嘉州防禦使遷山
南西道節度使加同平章事徙鎮永興太宗即位加中
書令開封尹封齊王進封秦王太宗北征命廷美留守
京師太平興國七年出為西京留守坐與宰相盧多遜

交通降涪陵縣公房州安置廷美憂悸成疾九年卒年三十八太宗聞之流涕詔曰涪陵公廷美朕之同氣也宜追封涪王謚曰悼真宗即位追復故官爵廷美子德恭衡州防禦使贈高密郡王德隆左武衛大將軍贈平陽郡王德彝保信軍留後贈潁川郡王謚曰安簡德雍天平軍留後贈廣陵郡王謚曰康簡德鈞右監門衛大將軍德欽德潤俱右羽林將軍德文忠武軍節度使同平章事封東平郡王贈申王謚曰恭裕德惠左武衛

將軍德存左羽林將軍德文子承顯以王後封康國公
官至昭化軍節度使贈樂平郡王本朝故事皇族本宮
之長封國公物故則以次授封德文以慶歷四年薨承
簡封徐國公承簡德鈞子也於屬為長得封官至保慶
軍留後贈安定郡王謚曰和懿承簡薨德雍子承亮封
昌國公神宗即位拜感德軍節度使改封榮熙寧二年
詔宣祖太祖太宗之子皆擇其後一人為宗世世封公
以奉祭祀不以服屬盡故殺其恩禮至三年太常禮院

言本朝近制諸王之後皆用本宮最長一人封公繼襲
去年詔祖宗之子皆擇其後一人爲宗世世封公即與
舊制有異謹按禮文諸王公侯伯子男皆子孫承嫡者
傳襲若無嫡子及有罪疾立嫡孫無嫡孫以次立嫡子
同母弟無母弟立庶子無庶子立嫡孫同母弟無同母
弟立庶孫曾孫以下準此合依禮令傳嫡承襲詔曰可
改封榮國公承亮爲秦國公宗肅魯國公宗達蔡國公
宗惠魏國公宗保燕國公仲邵陳國公世程越國公而

禮官言昭成太子陳王蔡王無後而宗保宗達仲郤以
旁親出繼自應典禮太祖之子越王德昭當立世長孫
世程太宗之子魏王元佐當立嫡孫同母弟宗惠魯王
元份當立嫡孫宗肅韓王元偃當立嫡孫宗績吳王元
儼當立庶長孫宗絳同判太常寺陳薦以秦王宜以庶
曾孫克繼嗣楚王宜以庶曾孫世逸嗣知禮院韓忠彥
等以秦王宜以庶長孫承亮嗣楚王宜以庶長孫從式
嗣詔秦王楚王後如忠彥議故承亮以下得立而宗績

宗絳以喪故後封從式已封郡王後嗣令依今所定於是宗室克繼等言封秦王之後不當詔兩制議翰林學士承旨王珪與范鎮司馬光等言臣等看詳秦王楚王魏王自有正統而承亮從式宗惠皆旁支今追議當為後之人豈可捨正統而取旁支也案秦王薨嫡子德恭當立德恭卒嫡子承慶當立承慶卒無嫡子有庶子五人長曰克晤先卒無子次曰克繼當立楚王薨長子惟叙卒嫡子從煦當立從煦卒無嫡子有庶子世逸一人

當立魏王薨嫡子宗魯當立宗魯卒嫡長子仲翹先卒
無子次母弟仲髦亦先卒次母弟仲蒼當立秦王楚王
後宜如薦議魏王後當以仲蒼嗣事下中書中書言越
王無嫡子嫡孫無嫡子同母弟無庶子無嫡孫同母弟
無庶孫宜以庶長孫世清嗣魏王無嫡子無庶子宜以
庶長孫宗立嗣世程宗惠不應封遂以宗立封魏國公
世清封越國公四年封宗續韓國公宗絳吳國公承亮
薨贈樂平郡王謚曰恭靜子克愉嗣克愉卒子叔牙嗣

徽宗即位秦王改封魏王

岐王光贊幼亡宋興追封夔王徽宗封岐王

太祖四子長滕王德秀次吳王德昭次舒王德林次秦王德芳滕王德秀早亡徽宗即位追賜名封滕王

吳王德昭字日新母皇后賀氏乾德二年出閣爲貴州防禦使故事帝子出閣當封王太祖謙抑止以列辟處之開寶六年授山南西道節度使同平章事終太祖之世竟不封以王爵太宗即位改鎮永興兼侍中始封武

功郡王太平興國四年暴薨年二十九贈中書令追封
魏王謚曰懿德昭謹重寡言左右未嘗見其喜愠之色
喜讀書不好犬馬之翫後贈太師治平元年改封越王
子惟正建寧軍節度使贈同安郡王謚曰僖靖惟吉感
德軍節度使同平章事贈南陽郡王謚曰康孝追封冀
王惟固昌州團練使惟忠武勝軍留後惟和右千牛衛
將軍惟吉子守節彰化軍留後同知宗正寺贈丹陽郡
王謚曰僖穆子世永封邢國公官至鎮南軍留後贈南

康郡王謚曰脩孝慶曆四年封十王之後以惟忠子從
靄封穎國公而惟吉子守巽以冀王後為最長與從靄
同封穎國公守巽官至和州觀察使從靄官至齊州防
禦使守巽從靄卒以惟固子從信封榮國公官至雄州
防禦使從信卒以惟固之孫從恪子世規封崇國公世
規官至右龍武大將軍沂州防禦使以卒守巽之子世
清封申國公至熙寧三年襲封越國公後封會稽郡王
會四后升祔受命告廟世清屬疾家人請以疾辭世清

曰辭君命不忠廢廟祀不孝力疾就事世清官至保信軍留後贈號王謚曰恭安

舒王德林早亡徽宗即位追賜名封舒王

秦王德芳開寶九年出閣為貴州防禦使太宗即位拜山南西道節度使同平章事薨年二十三贈中書令追封岐王謚曰康惠後贈太師改封楚王子惟叙左千牛衛大將軍贈高平郡王惟憲資州團練使惟能右羽林將軍慶歷中以惟叙子從煦封安國公終左金吾衛大

將軍歸州團練使從煦卒以惟能子從古封安國公終
延州觀察使謚曰惠恪從古卒從式封舒國公從式惟
憲子也神宗即位謂勦業垂統實自太祖顧無以稱乃
下詔曰昔我藝祖之興肇造區夏大謨偉烈被諸萬世
朕奉承聖緒夙夜不敢康乃顧後之子孫而有未議封
爵之典豈朕所以繼大統尊親親之意哉且積厚者流
必遠施大者報必豐其令中書門下攷太祖之籍以屬
近而行尊者一人裂土地而王之使常從獻于郊廟也

世世勿復絕以稱朕尊祖報本之志焉時熙寧二年八月也於是有司推擇以從式應詔封安定郡王從式終保康軍節度使贈榮王謚曰安僖從式既薨乃封越王之孫世準為安定郡王世準從霽子也為人內恕外嚴無綺羅金玉之好既封凡天子祀郊廟必從祀如詔旨世準官至保靜軍節度使薨贈成王世開嗣世開從誨子惟和孫也官至奉國軍留後薨謚曰獻敏世雄嗣世雄亦從霽子也秀整莊重以詩書教子孫貯書萬卷名

其堂曰樂善世雄官至崇信軍節度使薨贈淄王謚曰恭惠世福嗣官至集慶軍節度使薨贈儀王令盪嗣越王之後世清薨子令廓襲封越國公楚王之後從式薨子世恩襲封楚國公徽宗立改封越王為吳王楚王為秦王

太宗九子長漢王元佐次昭成太子元禧次真宗皇帝次商王元份次越王元傑次鎮王元偁次楚王元偁次周王元儼次崇王元億

漢王元佐字惟吉初名德崇母元德皇后李氏太平興
國五年出居內東門別第明年拜同平章事封衛王又
明年進封楚王更今名初秦王廷美得罪元佐獨申救
之由是失愛及廷美死元佐遂感心疾雍熙二年元佐
疾小愈重陽召諸王宴而元佐以疾新起不與元佐曰
諸王與宴而我不與是棄我也遂發憤中夜閉牖妾縱
火焚宮太宗怒廢為庶人寘于南宮眞宗即位爲左金
吾衛上將軍復封楚王眞宗東封拜太傅西祀拜太尉

中書令又遷太師加尚書令授天策上將軍賜劔履上
殿詔書不名仁宗即位以元佐伯父之尊恩禮甚厚薨
年六十三追封齊王謚曰恭憲改潞王治平元年進封
魏王子允升安國軍節度使贈平陽郡王謚曰懿恭允
言黃州刺史允成濮州防禦使允升子宗旦崇信軍節
度使開府儀同三司華陰郡王贈滕王謚曰恭孝仁宗
封王後以允言子宗說恭憲王長孫封祁國公皇祐中
坐亂其子婦除名又坐坑殺女僕於宗室外宅鎖閉卒

熙寧三年以宗惠襲封魏國公宗惠允升子中書以宗惠不應封而以允言子宗立襲宗惠官至武昌軍留後江夏郡王贈郟王宗立官至武寧軍留後贈南康郡王子仲來襲封官至金州刺史子不儻嗣徽宗立改封魏王為漢王不儻卒子彥清乞襲父爵奉漢王祀詔以彥清襲父爵

昭成太子元僖初名德明太平興國七年出閣授同平章事封廣平郡王八年進封陳王改名元佑詔班在宰

相下雍熙二年爲開封尹加兼侍中改今名太宗以契丹犯邊將大舉遣使往河北諸州科鄉民爲兵元僖論其不便時趙普亦言其事太宗納之普爲朋邪所疾元僖上表言普開國忠臣也願復以爲相太宗從之進封許王加中書令薨年二十七無子太宗哭之慟贈皇太子謚曰恭孝改謚昭成當仁宗之世以允成子宗達出後昭成太子爲孫熙寧三年封燕國公以奉其祀宗達卒贈新平郡王謚曰恭靖子仲恕襲封官至忠州團練

使謚曰純僖子士孟嗣

商王元份初名德嚴太平興國八年出閭改名元俊拜
同平章事封冀王又改今名加兼侍中威武軍節度使
進封越王淳化中兼領建寧軍改鎮寧海鎮東真宗即
位加中書令徙鎮永興鳳翔改王雍永熙復土爲山陵
使拜太傅真宗北征爲東京留守會得疾薨年三十七
贈太師尚書令鄆王改陳王又改潤王治平中封魯王
元份寬厚言動有禮子允寧寧武軍節度使贈信安郡

王次允中右屯衛將軍次則濮王也別傳濮王薨以允
寧子宗諤封虢國公至熙寧三年以宗肅襲封魯國公
宗肅亦允寧子也終安化軍留後子仲先嗣徽宗改封
魯王爲商王政和三年詔曰宗室諸王追封大國其世
襲子孫尚仍舊國甚未稱正名之意如魯王改封商王
其子尚襲魯國之類其令大宗正司改正制以寧遠軍
節度使魯國公仲先改封商國公

越王元傑字明哲初名德和太平興國八年出閣改名

拜同平章事封益王端拱初加侍中為劔南西川節度使淳化中徙封吳鎮淮南鎮江元傑嘗作假山既成名僚屬置酒共觀之翊善姚坦正直之士也獨頰首不視元傑強使視之坦曰坦見血山安得假山元傑問其故坦曰坦在田舍時見州縣督稅上下相剝急里胥臨門捕人父子兄弟送縣鞭笞流血滿身愁苦不聊生此假山皆民租賦所出非血山而何是時太宗亦為假山未成或以坦言聞太宗曰傷民如此何用山為亟命毀之

元傑有過失坦必盡言規正左右教元傑詐疾太宗憂之召元傑乳母入宮問疾增損狀乳母曰王本無疾以翊善檢束王起居故不樂成疾耳太宗怒曰吾選端士爲王僚屬者固欲輔王爲善今王詐疾欲使朕去正人邪且王年少未知出此必爾輩爲之因命杖之數十召坦慰安之至道二年移鎮淮南忠正眞宗即位授中書令徙鎮武寧泰寧封充王加太保薨年三十三贈太尉尚書令追封安王謚曰元惠元傑力學樂善後改封邢

王治平中追封陳王元傑無子仁宗以魏王之孫仲郃
爲之後熙寧三年嗣封陳國公官至陳州觀察使謚曰
良僖子士開嗣徽宗改封陳王爲越王

鎮王元偓字希道端拱元年出閣封徐國公至道二年
拜鎮南軍節度使真宗即位加同平章事封彭城郡王
改鎮靜難彰化進封寧王改王相累拜太尉兼尚書令
天禧元年改兼中書令歷鎮護國成德安國鎮寧封徐
王薨年四十二贈太師尚書令鄧王謚曰恭懿元偓姿

表偉異厚重寡言曉音律後改封密王又改王蘇治平
中追封韓王子允弼少與仁宗並席仁宗為皇太子除
英州刺史仁宗朝官至侍中武寧軍節度使判大宗正
寺北海郡王英宗朝拜中書令徙王東平神宗即位拜
太保鳳翔雄武軍節度使薨贈太師尚書令兼中書令
相王以允弼子宗續襲恭懿王封為韓國公卒贈南康
郡王謚曰良孝宗續弟宗景官至彰信軍節度使濟陰
郡王薨贈循王謚曰思宗續既卒子仲麇嗣徽宗改封

韓王為鎮王靖康元年仲曆自平川軍節度使徙鎮劔
南西川

楚王元偁字令問淳化三年出閣除武昌軍節度使真
宗即位加同平章事封安定郡王景德中遷宣德保寧
軍節度使進爵舒王真宗東封進兼侍中移平江鎮江
軍從祀汾陰加兼中書令徙鎮鎮南寧國拜太保堯年
三十四贈太尉尚書令曹王謚曰恭惠元偁好學善屬
文奉佛甚謹改贈華王治平中封蔡王子允則至右千

欽定四庫全書

東都事略
卷十五

十四

牛衛將軍先是諸王子授官即為諸衛將軍餘以父官及族屬親疎差等天禧元年令宗正卿趙安仁參議定制安仁請以宣祖太祖太宗孫初蔭授將軍曾孫授右侍禁元孫授右班殿直內父爵高者聽從高蔭其事緣特旨者不以為例詔中書門下樞密院參定行之允則無子以平陽懿恭王允升之子宗達為後熙寧三年襲封蔡國公以奉其祀宗達卒子仲湯嗣徽宗改封蔡王為楚王

周王元儼生而穎悟太宗尤所鍾愛而不欲早令出宮
每朝會宴集必侍左右期以年二十始得出就外傳真
宗即位封曹國公明年為平海軍節度使踰年拜同平
章事景德初封廣陵郡王真宗封泰山改鎮昭德等軍
進爵榮王祀汾陰加兼侍中徙鎮安靜武信祀太清宮
加中書令坐侍婢縱火延燔禁中奪武信節降封端王
尋拜鎮海安化軍節度使封彭王累拜太傅歷鎮橫海
永清保平定國封通王改涇王仁宗即位拜太尉尚書

欽定四庫全書

東坡事略
卷十五

十五

令兼中書令徙鎮安忠武軍節度使封定王賜贊拜不
名又賜詔書不名天聖七年徙封鎮明年賜劔履上殿
明道初拜太師換河陽三城節度使改封孟又改鎮永
興鳳翔進封荆王景祐二年改荆南淮南節度大使仍
賜入朝不趨元儼廣顙資質嚴重凜凜不可犯名
聞外夷契丹尤畏其名事母孝嚴幼好學喜聚書善爲
文又善二王書法及飛白性謹約寡者欲天聖以來太
宗諸子獨元儼在仁宗尊寵甚異元儼不敢數入闔門

不接人事好坐木馬子坐則不下或飢則便就其上飲食往往乘興奏樂於前酣飲終日其疾亟時仁宗親為調藥屏人與語久之所對多忠言薨年六十贈天策上將軍追封燕王謚曰恭肅治平中改封吳王有子十三人允良允迪允初餘皆早死允良泰寧軍節度使襄陽郡王允良好酣寢以晝為夜由是一宮之人皆晝睡夕興然性寬裕不甚喜聲色亦不為他驕恣未嘗詰責左右薨贈定王有司以允良起居無度反易晦明謚曰易

允迪居父喪哭不哀又嘗宮中為優戲劇曰安靜軍節
度使允迪五刑之屬三千其罪莫大於不孝小民無知
犯者猶鮮況爾燕恭肅王之子而朕之諸弟也宜率訓
義以迪四方而乃在苴麻泣哭之哀為酣飲流酗之佚
肆情鄙行害于而家而達於朕聞嗟怨無已朕苟貸法
何以處王公之上而教天下哉宜歸爵秩下領屯衛蓋
寬於馭過而欲循省其罪無蹈後悔也可責授右監門
衛大將軍久之遷密州觀察使復鎮安靜卒贈永嘉郡

王謚曰思恪允初寧國軍節度使贈博平郡王謚曰安
泰熙寧中以允良子宗絳嗣封吳國公徽宗改封吳王
為周王

崇王元億早亡追賜名封代國公治平中封安定郡王
徽宗即位賜崇王

東都事略卷十五

欽定四庫全書

東都事略卷十六

宋王稱撰

世家四

真宗六子長溫王禔次周王祐次昌王祗次信王祉次
欽王祁次仁宗皇帝

溫王禔早薨徽宗即位追賜名贈溫王

周王祐字慶長母曰章穆皇后咸平中封信國公生九
年而薨追封周王謚曰悼

昌王祗早薨徽宗追賜名贈昌王

信王祉早薨徽宗追賜名贈信王

欽王祈早薨徽宗追賜名贈欽王

仁宗三子長揚王昉次雍王昕次荆王曦

揚王昉生未踰月而薨追封褒王賜名昉謚曰懷靖後
封魏王治平中封周王徽宗即位贈揚王

雍王昕封壽國公生三年而薨追封豫王謚曰悼穆改
封魏王治平中封唐王徽宗贈雍王

荆王曦慶厯三年生生三年封鄂王賜名曦未及宣制而薨謚曰悼懿改封陳治平中封燕王徽宗贈荆王

濮王諱允讓字益之恭靖商王元份之子也爲人天姿渾厚外莊而內寬左右親近未嘗見其有喜愠之色始爲右千牛衛將軍周王薨真宗以綠車旌節迎養于禁中至仁宗生用簫韶部樂送還邸真宗時官衛州刺史仁宗即位授汝州防禦使累拜寧江軍節度使仁宗建睦親宅乃命知大宗正寺宗子有好學趨義則褒勉委

曲進之於善若不率教始勸諭之又糾戒之至不悛則正其罪而上聞故人人莫不畏愛而心服之慶厯四年封汝南郡王拜同平章事改判大宗正寺嘉祐四年薨年六十贈太尉中書令封濮王謚曰安懿仁宗在位既久無子乃以王第十三子爲皇子仁宗崩皇子即位是爲英宗治平元年宰相韓琦等奏以濮安懿王德盛位隆宜有尊禮請下有司議濮安懿王及譙國夫人王氏襄國夫人韓氏仙遊縣君任氏合行典禮詔須大祥後

議之至二年乃詔禮官與待制以上議翰林學士王珪等奏曰謹按儀禮喪服爲人後者傳曰何以三年也受重者必以前服服之爲所後者祖父母妻之父母昆弟之子若子者皆如親子也又爲人後者爲其父母傳曰何以期不二斬特重於大宗降其小宗也爲人後者爲其昆弟傳曰何以大功也爲人後者降其昆弟先王制禮尊無二上若恭愛之心分於彼則不得專於此故也是以秦漢以來帝王有自旁支入承統者或推尊其父

母以爲帝后皆見非當時取譏後世臣等不敢引以爲
聖朝法況前代入繼者多宮車晏駕之後援立之策或
出臣下非如仁宗皇帝年齡未衰深惟宗廟之重祇承
天地之意於宗室衆多之中簡推聖明授以大業陛下
親爲先帝之子然後繼體承祧光有天下濮安懿王雖
於陛下有天性之親顧復之恩然陛下所以負宸端冕
富有四海子子孫孫萬世相承皆先帝德也臣等竊以
爲濮王宜準先朝封贈期親尊屬故事尊以高官大國

譙國襄國仙遊亦封太夫人攷之古今為宜稱於是中書奏王珪等所議未見詳定濮王當稱何親名與不名珪等議濮王於仁宗為兄於皇帝宜稱皇伯而不名如楚王涇王故事中書又奏儀禮令及五服年月敕出繼之子於所繼所生皆稱父母又漢宣帝光武皆稱父為皇考今珪等議稱濮王為皇伯於典禮未有明據請下尚書省集三省御史臺議奏方議而皇太后手詔詰責執政於是手詔聞集議不一宜權罷議當令有司博求

典故以聞禮官范鎮等又奏漢之稱皇考稱帝稱皇立
寢廟序昭穆皆非陛下聖明之所法宜如前議為便自
是御史呂誨等彈奏歐陽脩首建邪議韓琦曾公亮趙
槩附會不正之罪固請如王珪等議既而內出皇太后
手詔曰吾聞羣臣議請皇帝封崇濮安懿王至今未見
施行吾載閱前史乃知自有故事濮安懿王譙國夫人
王氏襄國夫人韓氏仙遊縣君任氏可令皇帝稱親濮
安懿王稱皇王氏韓氏任氏並稱后事方施行而英宗

即日手詔曰稱親之禮謹遵慈訓追崇之典豈易克當
且欲以塋為園即園立廟俾王子孫主奉祠事翌日誨
等以所論列彈奏不見聽用繳納御史敕告家居待罪
誨等所列大抵以為前詔稱權罷集議後詔又稱且欲
以塋為園即追崇之意未已英宗命閣門以告還之誨
等力辭臺職誨等既出而濮議亦寢至神宗元豐二年
詔以濮安懿王三夫人可並稱曰王夫人云濮王長子
宗懿當英宗時為宿州團練使封和國公次子宗樸為

欽定四庫全書

東都事略
卷十六

五

隴州防禦使封岐國公宗懿卒神宗以宗懿濮安懿王
元子追封舒王宗樸與英宗相友爱初詔英宗入居慶
寧宮固辭不即赴宗樸帥近屬敦勸乃入治平中建濮
王園廟宗樸遂拜彰德軍節度使濮國公以奉王後神
宗即位加同平章事兼侍中封濮陽郡王薨贈定王弟
宗誼襲濮國公官至昭化軍節度使同平章事贈廣陵
郡王宗誼既薨宗暉襲封濮國公自邕州觀察使拜淮
康軍節度使元豐中濮王三夫人改祔濮王園以宗暉

為鎮安軍節度使同平章事神宗詔宗暉嗣封濮王哲
宗即位徙鎮鎮南薨贈懷王謚曰榮穆以宗晟嗣官至
武安軍節度使贈昌王謚曰端孝宗晟薨宗愈嗣官至
鎮南軍節度使開府儀同三司贈襄王宗愈薨宗綽嗣
官至河陽三城節度使開府儀同三司贈榮王謚曰孝
端宗綽薨宗楚嗣官至武昌軍節度使贈惠王謚曰僖
節宗楚薨宗祐嗣官至清海軍節度使贈欽王宗祐薨
宗漢嗣官至奉寧軍節度使開府儀同三司贈景王宗

漢薨仲增嗣仲增濮王孫於屬為長故封官至彰德軍
節度使開府儀同三司贈簡王仲增薨仲御嗣官至奉
寧軍節度使開府儀同三司贈郇王謚曰康王仲御薨
仲爰嗣官至武定軍節度使開府儀同三司判大宗正
寺贈恭王仲爰薨仲理嗣靖康初為武安軍節度使開
府儀同三司

臣稱曰禮大宗無子而以小宗為後聖人許之英宗既
以父仁宗矣若濮王又稱親則是二統也父子之道天

性也君臣之義也藉使濮王極其尊崇則於君臣之義得為安乎當時大臣違禮廢義臺臣焉得不以死爭之英宗容受盡言寢而不議而使後世無可指之瑕聖矣夫

英宗四子長神宗皇帝次吳王顥次潤王顏次益王顥吳王顥字仲明母曰宣仁聖烈皇后始名仲糾授率府副率英宗即位遷至明州觀察使封祁國公賜今名拜保寧軍節度使同平章事東陽郡王治平三年出閣居

東宮神宗即位拜武昌武安軍節度使封昌王易泰寧
鎮海軍改王岐官制行冊拜司空徙王雍哲宗嗣位拜
太保換成德橫海二鎮徙封楊王用周漢故事賜贊拜
不名五日一朝見於禁中神宗祔廟拜太傅移鎮京兆
鳳翔元祐初與荆王頽遷外第名曰親賢宅拜太尉諸
子自勝衣以上皆命進官制曰先皇帝篤兄弟之好以
恩勝義不許二叔出居于外蓋武王待周公之意太皇
太后嚴朝廷之禮以義制恩始從其請出就外宅得孔

子遠其子之意二聖不同同歸于道可以爲萬世法朕
承侍兩宮按行新第顧瞻懷思潜然出涕昔漢明帝問
東平王在家何以為樂王言爲善最樂帝大其言因送
列侯印十九枚諸子年五歲以上悉佩之著之簡策天
下不以為私今王諸子性于忠孝漸于禮義自勝衣以
上頎然皆有成人之風朕甚嘉之其各進一官以助其
爲善之樂尚勉之哉母忝乃父祖以為邦家光徙封徐
王詔書不名宣仁祔廟拜太師徙王冀賜入朝不趨改

淮南荆南節度使徙封楚初宣仁不豫顥日問起居因
以被疾至是薨年四十七哲宗哭之慟成服苑中贈尚
書令兼中書令謚曰榮顥薨之五日以月朔應視朝于
文德殿哲宗以顥未成服改視垂拱云顥通經史工飛
白善鼓琴神宗臨御久友愛彌篤哲宗尊禮尤隆既薨
葬于永厚陵之北徽宗即位追封吳王子孝騫靖康初
為定武軍節度使晉康郡王孝錫終嘉州防禦使贈永

國公

潤王顏早薨徽宗追賜名贈潤王

益王顏初賜名仲恪為率府副率英宗時賜今名遷至
耀州觀察使神宗即位拜同平章事領武勝軍節度使
樂安郡王熙寧四年出閣拜保信保鎮軍節度使封嘉
王元豐三年拜司空徙王曹哲宗即位拜太保鎮武昌
武安進爵荆王賜贊拜不名五日一朝禁中哲宗致恭
如家人禮神宗祔廟拜太傅徙武寧鎮海元祐元年始
居外第拜太尉改鎮成德荆南薨年三十三贈太師尚

書令魏王謚曰端獻徽宗改封益王頴端重明粹博通
羣書有智識好釋氏亦好方書數捐藥以救病者其仁
厚蓋天稟云子孝哲邢州觀察使贈廣陵郡王孝怡終
保寧軍節度使孝參靖康時為武勝軍節度使豫章郡
王孝奕終彰化軍留後贈平原郡王孝騭靖康時為武
寧軍節度使孝忱奉寧軍節度使孝頴順昌軍節度使
孝愿靖難軍節度使

東都事略卷十六